

TE HEHEURAA API

I neia i te piha neneiraa a Henere, i Roto Miti i Utah, no te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avaa atoa. Te hoo, e piti farane i te matahiti hoe.

Nu. 1

Tenuare, 1914

Mat. 9

“Tei nia ia'u te varua o te Fatu ra o Iahova, no te mea, ua faa-tahinu mai Iahova ia'u; ua tonono mai oia ia'u ei faaite i te parau oaoa i te aau maru ra: ei faaora hoi i te feia aau oto; e faaite i te ora i te titi: e ia matara roa te feia i tapeahia ra.” Isaia 61: 1.

TE ORA NO TE FEIA I POHE RA.

I faaauhia e re'o Tahiti e Adamu Minera.

I faaite-pinepine-hia i roto i te Heheuraa Apî te ravea e ora'i te feia ora nei, mai te au i te Bibilia e i te mau heheuraa a te Atua i te Peropheta ra o Iosepha Semita i teie nei mau mahana hopea nei. E te faaite atu nei matou i roto i teie nei papairaa te ravea e ora'i te feie i pohe ra. Ua moe i teie nei ravea i to te ao nei i muri iti a'e i te poheraa o te mau Aposetolo no Iesu, e ua moe te reira i to te mau haapaoraa Cherisitiano i teie nei auotau; e no reira te titau nei matou ia outou o te tai'o i teie nei parau, ia tai'o outou ma te feruri maite i to matou tatararaa i teie nei parau faufaa rahi roa, ia ite outou i te huru parahiraa o to outou fetii i pohe.

Ua haapiihia e te mau orometua Cherisitiano e, e, tapeahia te ora i te mau taata atoa o te ore i faaroo e i farii

hoi i te Evanelia a Iesu Mesia, i roto i teie nei oraraa nei. Ua faatumuhia teie nei huru haapiiraa i nia i te mana'o e, ia pohe roa te taata e haere oia i te basileia o te Atua e e parahi oia i reira ma te hau e te peapea ore e amuri noa'tu; e aore râ e haere oia i Hade ia parahi i roto i te hoê roto auahi e amuri noa'tu. Ua patoi râ teie huru haapiiraa i te mau parau i papaihia i roto i te Bibilia. Ahiri te reira e parau mau, aita o tatou e tiaï, maori râ i roto i teie nei oraraa ana'e. E ahiri te reira e parau mau e faahapahia te mau tausani e raverahi o te mau taata tei parahi i roto i teie nei ao i te mau tau i haapii-ore-hia te Evanelia a Iesu Mesia. Ahiri te reira e parau mau e faahapahia te pae rahi o to teie nei ao i teie nei anotau, no te mea aita roa ratou i faaroo i te evanelia e aita hoi ratou i ite i te i'oa o te Mesia. E teie nei, ahiri aita te Atua, o tei ite i te mau mea atoa, mai te haamataraa mai â, i faaineine i te hoê ravea ia faaora i ta'na mau tamarîi, aita i tia ia tatou i ite ia'na e Atua aroha e te faaoromai.

Aita i tia ia tatou e mana'o e, o te Atua, te Metua no te mau varua atoa no to te ao nei, Oia tei i te aroha e te faaoromai e faatia i te pae rahi no ta'na. mau tamarîi ia hurihia i roto i te hoê roto auahi no to ratou farii ore i te evanelia tei haapii-ore-hia ia ratou i te pae tino nei.

Ua huna teie huru faaroo i te aroha o te Atua. Te titau nei te reira ia faariro te Atua ei Atua faatia pae tahi; e ua huna'toa hoi te reira i te paari o te ravea no te ora tei opuahia hou te hamamiraahia no teie nei ao. Aita roa râ te Atua e Atua aroha ore, e aita hoi te hoê hape iti e vai nei i roto i te ravea no te ora. E vai mana te ravea no te ora i teie nei ao e i te ao i muri nei e mai reira'tu â, e e fau-faahia tatou i te reira i te ao varua.

E teie nei, ia faufaahia tatou i te feruiraa i te ravea no te ora no te feia i pohe, ia roaa ia tatou e tia i te mana'o tano no te Haamataraa o te Taata e te huru o to'na fetiiraa

i te Atua. E rave rahi te mau taata i faaroo e, ua tupu te taata i te matamua no roto mai i te kuphi, oia hoi i te uri taata. E rave rahi te mau taata i faaroo e, aita to te taata e ora hou to'na fanauraa i roto i teie nei ao. Ua hapa râ te reira huru faaroo e te reira huru mana'o. E huaai te taata no te Atua to tatou Metua i te ao ra, te Metua no te mau varua atoa no to te ao nei. Tei te taata te tino i'o e te tooto, e te tino varua'toa hoi. Na roto i teie amuiraa e tia i te varua e tupu i te paari.

E taio tatou i teie nei i te tahi mau parau i papaihia i roto i te Bibilia tei faaite papu ia tatou e, e ora to te taata hou to'na fanauraa i te pae tino nei. Ua parau atura te Atua ia Ioba: "O vai teie e haapouri i te haapaoraa i te parau ana'e ra aore e ite ra? A tatua na i to tauupu mai ta te taata; e ui na vau ia oe, e na oe e faaite mai ia'u. Thea oe ia'u i haamau i te tumu o te fenua nei? A faaite mai na, peneia'e te ite ra oe. A fatu atoa'i te mau fetia poipoi i te himene e ua pii noa te mau tamarii atoa a te Atua i te oaoa?" (Ioba 38: 2, 3, 4, 7.) Ia parahi Ioba i te tahi vahi i reira e tia'i, ahiri aita, nafea to te Atua uiuiraa'tu ia'na? Tei teie nei mau parau: ua himene te mau fetia poipoi e te mau tamarii a te Atua i te oaoa, te uiraa rahi e te maitai.

Tera mai te uiraa: O vai teie mau tamarii a te Atua? O vai teie mau fetia poipoi? O te mau varua ia no te utua-fare no te Atua o tei tia'i noa i te tau i tia ia ratou e rave i te hoê tino ei parahiraa no te ratou mau varua, ia tupu to ratou varua i te paari. Ua ite tatou o vai tera mau tamarii na roto i te tai'oraa i te Luka 3:38. Ua na ô atura te Taioraa: Enosa, na Seta, na Adamu, na te Atua.

E taio nei tatou i te Numero 16:20 i teie nei mau parau: "E te Atua, te Atua no te mau varua o te taata atoa ra, hoê anei taata e rave i te hara, e e riri â oe i te amuiraa atoa ra?" e i te pene 27:16 no taua buka ra teie i papaihia: "E tuu oe, e Iehova, e te Atua o te mau varua o te taata

HISTORIAN'S OFFICE LIBRARY

The Church of Jesus Christ of Latter-day Saints

13242

atoa ra, i te hoê taata i nia iho i teie nei amuiraa.” Ua faa-itehia i roto i teie nei mau irava e, e, haamataraa mo’a to te taata, e teie nei e ite ai tatou i te faufaa no te Iesu haapiiraa ia parau oia e: “E na ô outou ia pure: E to matou Metua i te ao ra.” Mai te mea te Atua e Metua no tatou, e mea papu roa ia tatou e, e, haamataraa mo’a to tatou, e e ora hoi to tatou hou to tatou taeraa mai i teie nei ao. Ia haapapuhia i to outou mana’o i nia i te reira vahi, e tai’o tatou i te parau i papaihia i te Koheleta 12:7. Teie hoi te parau: “E reira te repo e ho’i ai i raro i te repo no reira mai oia ra, e ho’i râ te varua i te Atua i horoa maira.”

Ahiri aita te varua o te taata i vai ra hou to’na taeraa mai i roto i te tino tahuti i teie nei ao, eaha to’na ravea e ho’i atu i te Atua i horoa maira? Ua itehia te ora matamua i te mau aposetolo na Iesu ia ua ratou ia’na i teie nei uiraa no te taata matapô: E Rabi, na vai te hara, na’na iho anei, e na na metua anei, i fanau matapo mai ai oia?” (Ioane 9:1-2). Ua ite papu te mau aposetolo e, e ore roa te Atua e faautua i te hoê taata hou ta’na raveraa i te hara, e no reira, ua hinaaro ratou ia ite e, ua roaa anei to’na utua ia’na no te mau hara ta’na irave hou to’na fanauraa i roto i teie nei ao. Tei Ieremia 1:4, 5 Te tahi parau no te ora matamua: “I reira te parau a Iehova i te taeraa mai ia’u nei, e te na ôraa e, Aita oe i hamanihia e au i roto i te opu, i ite ai au ia oe; e aita oe i fanau i faataahia’i oe e au; e ua haapaohia oe e au, ei peropheta no te mau fenua.”

Ua roaa ia tatou te parau na te Atua iho i roto i teie nei irava tei faaite ia tatou e, na te Atua i maiti e i haapao i te hoê tamaiti na’na ei peropheta hou te fanau raa o taua tamaiti ra i teie nei ao. Ahiri aita to Ieremia e ora hou to’na fanauraa i teie nei ao, aita te Atua i maiti e i haapao ia’na ei peropheta no te mau fenua, no te mea, aita roa e tia i te Atua e hamani i te hoê mea na roto mai i te aore. Ua na ô atura Paulo: “E e metua hoi to tatou to te tino

nei o tei a'o mai ia tatou, e ua faahiti hoi tatou, eiaha ia rahi atu to tatou auraro i te Metua o te varua nei, e ia ora' tu." (Hebera 12:9.)

Ua au teie mau parau na Paulo i te mau parau i tai'ohia a'enei. Ua roaa ia tatou te ite i teie nei e, e metua tahuti e e Metua tahuti ore to tatou. Ua roaa ia tatou te ite e, o te Atua o te Metua ia no te tatou mau varua, e e ora hoi to tatou hou to tatou taeraa mai i teie nei ao. Ua ite te mau taata ferurui e, tei te taata e pae tahuti e e pae tahuti ore. Te ite atoa nei ratou e, ia pohe te tino e tia'i, te varua râ, e ora e amuri noa'tu. E no reira te ite nei tatou e, tei te varua te ora hou to'na amuriraa i te tino tahuti, e i muri atoa hoi i te poheraa no te tino tahuti. E aha te tumu o te mana'o papu ore no te tahi mau taata e rave rahi no te ora matamua? Ua faaite papu roa Iesu (to tatou tuaana i te varua) i te parau mau no te reira vahi. A faaroo outou i ta'na mau parau: "Amene, Amene, e parau atu vau ia outou, Aita Aberahama i fanau, e vai nei au." (Ioane 8:58.) "E teie nei, e tau Metua, e haamaitai mai oe ia'u i mua i to aro na i te maitai no'u ia oe hou teie nei ao ra." (Ioane 17:5) "ahiri paha outou i ite na i te Tamaiti a te taata i te ho'i-faahouraa'tu i nia i te vahi ta'na i parahi i mutaa ihora?" (Ioane 6:62.)

Ua haapii atoa te Bibilia e, o Iesu te matahiapo i te mau tamarii atoa na te Atua, "o te huru mau oia o te Atua hi'o-orehia ra, o tei fanau na i te mau mea atoa i hamanihia ra." (Kolosa 1:15.) E mea papu ia tatou e, mai te mea, o Iesu te matahiapo na te Atua i reira e mau teina te mau taata atoa no Iesu, no te mea e tamarii ana'e tatou na te Atua. Teie te mana'o no Paulo ia parau oia e, "ia riro oia ei matahiapo i te mau taeae e rave rahi ra." (Roma 8:29) e i te tahi vahi ua na ô atura oia, "O te Mesia hoi o tei tamâ mai, e te feia i tamâhia ra, hoê â ia Metua, e ore ai oia e haama ai ia parau mai ia ratou e, e taeae." (Hebera 2:11)

The tai'o nei tatou i te Apokalupo 22:16 e, ua parauhia Iesu e, "e fetia poipoi anaana ra," e i te Ioba 38:7 teie i papaihia: "A fatu atoa'i te mau fetia poipoi i te himene, e ua pii noa te mau tamarii atoa a te Atua i te oaoa."

Taua mau fetia poipoi o te mau teina ia no Iesu, e tamarii ana'e ratou na te Atua e te arue ra ratou i te Fatu no te mea ua tae te taima i reira ia hamani te Atua i teie nei ao, e ua mauruuru roa ratou i te ravea i faaineinehia, ia haere mai ratou i te ao nei e rave i te hoê tino tahuti ei parahiraa no ratou, ei reira na roto i to ratou haapao maitai i te mau faaue na te Atua e roaa ia ratou te hoê tino tahuti ore mai ta to Iesu i muri a'e i to'na tia faahouraa. Aita râ teie haamaitairaa rahi i horoahia i te mau tamarii atoa na te Atua no te mea ua orure te toru o te tufaa o te mau fetia o te ra'i i te Atua, e no reira ua hurihia ratou i rapai, e aita a ratou e ravea ia noaa ia ratou te hoê tino tahuti e teie hoi to ratou utua no te ratou orureraa. Ua faaitahia te huru o taua tamai ra i te Apokalupo 12: 3-10. Tei roto te hoê himene te mana'o afaro maitai no te ora mata-mua. Tera mai te himene:

1. Tau Metua, tei i nia,
Tei to vahi mo'a na,
Afea vau e tae ai i reira,
E ia oe e ite faahou?
O te fare maitai roa na,
I mâtauhia na e au,
I ora vau i tahito ê ra,
I to aro maitai na.
2. No to opuaraa paari,
I tae ai au i raro nei;
Moe atura te mana'oraa,
Tau mau hoa tahito ra.


Tupu nei râ te mana'oraa,
Taata ê au i ò nei,
No ò mai râ i te Atua,
No te vahi teitei a'e.

3. No ta te Varua faaite,
I pii ai au, tau Metua;
Aita râ i ite i te tumu,
E ia tae te ite apî.
Hoê noa iho Metua i nia?
Eiaha, e mana'o huru ê;
E piti râ te vai noa ra,
Mai tei raro roa nei.

4. Pohe ta'u nei tino tahuti,
Ia vaiihohia i ò nei,
Ia tae au, na Metua here,
I to fare teitei roa.
Ia oti te ohipa,
I tae ai au i raro nei,
Ia au ia orua na,
Ta'u parahiraa i ò na.

(E tuatihia teie parau.)





E na hoho'a teie no te matou taeae e to matou tuahine o Ernest C. Rossiter, oia hoi o Eraneta e ta'na vahine o Venus. Ua maitihia raua ei orometua i to Tahiti ma, e i roto ia Mati e tae atu ai raua i Tahiti. E riro Eraneta i te faatere i te ohipa no te Ekalesia i te paeau moana ra ei mono ia Farani Fulumare. E teina o Eraneta no te hoê orometua i te matamua roa o Fereti (nainai), e ua rave oia i te ohipa orometua i Farani e i Belegiama i na matahiti a'enei.

TE MAU PARAU API.

I te 14 no Tenuare ua roohia te Italia i te hoê ati ino rahi roa; oia hoi ua tupu faahou i taua fenua ra te hoê ueueraa fenua ri'ari'a roa e i pohe roa, e aore râ i haaparuparuhia, e hau a'e e 50,000 taata.

Ua faaino roa-hia te tufaa ropu o te fenua mai te tahi miti e tae i te tahi miti, e roaa e 300 maile te roa o te tufaa fenua i ino. Ua parauhia ua mou roa te tahi mau oire e to reira atoa. Te pae rahi roa o te mau fare parahiraa e te mau fare pureraa rahi i Italia i faatiahia i te tau tahito e e patu ia e aore râ e ofai, aita rea e fare raau; no reira ia ueuehia te fenua i amaamaha noa taua mau huru fare ra e i mairi i raro hoi i nia iho i te mau taata e parahi o roto ra.

E hoê afa minute te maoro o te ueueraa, tirara'tu'i. E raverahi te mau fare tahito e te nehenehe roa i Roma i faainohia, aita râ Roma i te pu mau o te ueueraa tei te hiti râ; te tahi pae fare i reira i mairi i raro e ua parari e raverahi te mau tii i roto i te mau fare pureraa. I muri iti a'e i te ueueraa fenua ua tono hia'tu, mai Roma atu, e rave rahi te mau taote e te mau tuaati e utuutu atu i te feia i haaparuparuhia, ua tono atoa hia te tahi mau pupu faehau e tauturu i te heru i rapae te mau taata i tapoihia i te mau hu'a fare. E i vai â na tausani taata i raro a'e i te mau fare i mairi i raro. Ua tai'o hia i roto i te hoe parau apî i roto i te hoê vea e faaite mai e, e vau mahana i muri iho i te ati ua iritihia mai te tahi mau taata no raro mai te tahi fare i mairi mai e ua ora taua mau taata, ua poia roa râ ratou e te poiha.

Ua haere tia'tu te arii o Emanuela i te tahi mau oire i ino roa ei faaitoito atu i to'na feia i roohia i te ati.

—o—

I te 16 no Tenuare.

Tei roto â Italia i te ati, i muri iho i te ueueraa fenua, ei reira i tupu te hoê vero e ua maiti mai te hiona e ua ati-

hia ratou i te toetoe. Ua pau atoa to ratou maa. I te tahi mau oire e mea hau'a ino roa no te mau tino pê i vai noa ra, aita i tanuhia. Ua ueue rii faahou te fenua e i mehamaha roa te mau taata e ua mata'u ratou e parahi i roto i te mau fare i toe mai, a topa'i taua mau fare ra i nia ia ratou. Ua hanere te fare pureraa i mairi iraro. I te matahiti 1908 ua roohia Italia i te hoê ati ino roa mai te faaitehia i nia nei.

—o—

Na te tama'i i Europa te tumu i pee roa i nia te moni e hoo faraoa hu'a; te tahi faraoa i hoohia i Amerika nei e vau dala i te baero hoê. E moni rahi i titau atoa hia e te feia hoo tao'a no te mau huru maa atoa, e no reira i ati hia te feia veve i Amerika nei; e aita rea te ohipa e roaa mai te moni.



Te hoê Generale rahi no te faehau Baretaine, o Sir John French, to'na i'oa.

TE MAU PARAU API NO TE TAMA'I I EUROPA.

—o—

I te 1 no Tenuare.

I teie nei mahana ua tomo roa te hoê pahi manuâ a te Baretane, o Formidable to'na i'oa. E pahi rahi e e roaa e 15,000 tani e tei i nia ibo ia'na e 750 taata, e mau faehau moana ratou.

Aita i papu te tumu i paremo ai oia, i mana'ohia râ ua pupuhi hia oia no raro mai e te hoê pahi hopu a te Purutia. Ia tomo taua pahi ra ua pohe e rave rahi taata; e 71 taata ana'e tei ora mai.

—o—

I te 4 no Tenuare.

E mea maoro te tama'iraa i pihai iho i te oire ra i Steinbach. Tei te Purutia taua oire ra, i teie nei mahana râ ua riro i te Farani.

—o—

I te 18 no Tenuare.

No te toetoe rahi aita rea e mau aroraa; e aita hoi i upootia te tahi pae. E mauruuru te mau faehau e parahi i roto i to ratou mau apoo i heruhia ei paruru ia ratou i te mau ofai a te enemi e ei paruru ia ratou i te toetoe.

—o—

I te 20 no Tenuare.

I faatere hia'tu te tahi mau pahi rarahi maue no te Purutia mai Purutia atu i Baretane e ua faatopa ratou te tahi mau topito i nia te tahi mau oire Baretane, Ua tohu hia teie nei huru ohipa na matahiti a'enei, aita râ i ravehia e tae i teie nei. Ua haere mai taua mau pahi reva e vahi ro-

roa i te pô to ratou haereraa e ua tae ratou i Baretane i poipoi roa. Ua tamata ratou e faatopa te tahi topito i nia te tahi fare no te arii aita râ i tano te topito. Ua pohe te tahi mau taata rii.

—o—

I te 25 no Tenuare.

Ua upootia te nuu moana o te Baretane i teie nei mahana. Ua tamata faahou te mau pahi manuâ o te Purutia e pupuhi atu i te mau oire Baretane i tahatai mai ta ratou i rave i roto i Titema. Aia râ ratou i manuïa i teie taïme. Ua haere omoe mai e maha pahi rarahi e e maha pahi huru nainai e e raverahi te mau pahi topito mai Purutia mai. Ia haafafatata i Baretane ua faarerei ratou i na pahi rarahi o te Baratane e pae e i te tahi mau pahi huru iti ei reira ihora hamata'i te tama'i.

Ia ite te Purutia e mau pahi rarahi roa o te Baretane ta ratou i farerei ua horo atu ratou. Ua auau atu te Baretane ia ratou ma te pupuhi atu ia ratou. Ua tomo roa te hoê pahi rahi o te Purutia, o Bluecher to'na i'oa; e ua pohe e 700 taata i nia ia'na e e 123 taata i faaora hia e te mau pahi Baretane. E 11 taata faehau Baretane ana'e i haaparuparuhia.

Toae a Maere, Faaau Parau,
Rue Dumont d'Urville, Orovini, Papeete, Tahiti.

Frank J. Fullmer, Imprimeur,
2532 Seventh East Street, Salt Lake City, Uta, U. S. A.